

Tutu ñaoví nítáa táJuan ña tí'ví ra kua'an nda'a ñivi na kándixa Jesucristo

*Xí'in to'on yó'o táJuan ká'an ra chíndeé ra ñivi na kándixa
Jesucristo na táku inká ñoo*

¹ Yí'í, taa tá kúu taxikua'a, taa í tutu yó'o xaa ña nda'a ndó'ó, na kúu ñivi na ñakaxin Ndios ña kandixa ndó Jesucristo ta kundikōn ndó yichí ra. Ndino'o ini í kí'vi ini í xíni í ndó'ó, ta on sivi ñii laá yí'í kí'vi ini í xíni í ndó'ó, ta ndi'í ñivi na xa xíni va'a yu kúu ñandaá, ñii káchí saá ñivi yó'o kí'vi ini na xíni na ndó'ó. ² Saá chi yóo ñandaá táku ña ini yó vitin, ta kutaku ka ña ini yó ndi'í saá kivi ña vaxi, ta xa'a ña kómí yó ñandaá yó'o, kí'vi ini yó xíni tá'an yó. ³ Yivá yó Ndios xí'in Sa'ya ra Jesucristo, jná ke'é ra kua'a ní ñava'a xí'in yó! ¡Ná kundá'ví ini ra koni ra mji yó! Ta, jná taxi ra ña kunakaá ñava'a ini yó! Ta, jva'a ná kundikōn yó yichí ñandaá, ta ndixa ná kuki'vi ini yó koni tá'an yó!

*To'on yó'o ká'an ña ndí xíni ñó'ó
kuki'vi ini yó koni yó natá'an yó*

⁴ Kúsií ní ini í chi xa ñakutá'an í xí'in sava ndó'ó, ñivi na kándixa Jesucristo, ta saá kúndaá ini í ndí ndó'ó kúu ñivi na va'a ndikōn yichí ñandaá. Ta ñii kí'va ndatán yóo ña xá'nda chiño Yivá yó Ndios ñoo yó kasa ndivi yó, saá yóo ña kisa ndivi ndó. ⁵ Ta vitin, nañani yó xí'in náki'va yó, xáku ndá'ví í ñoo ndó ndí ndixa kuki'vi ní ini yó koni tá'an yó. To'on yó'o on sivi ñii to'on xaa ña xá'nda chiño í ñoo ndó kúu ña, chi ñii káchí kúu ña xí'in ña xa xíni so'o yó nda kivi kixá'á kándixa yó Jesucristo. ⁶ Tá ndixa kí'vi

ini yó xíni yó natá'an yó, ta xí'in ña ké'é yó saá sáná'a yó ndí kísa ndivi yó ña xá'nda chiño Ndios noo yó. Saá chi nda kivi kixá'á ndó kandixa ndó Jesucristo tãnda vitin, xa xíni so'o ndó to'on ña xá'nda chiño ra noo yó, ña káchí saá: Xíni ñó'ó kutaku yó xí'in ña kuki'vi ini yó koni yó Ndios, ta kutaku yó xí'in ña kuki'vi ini yó koni yó natá'an yó.

⁷ Ñoyívi yó'o xa xíka kuá'a ní ñivi na kóni sandá'ví ndó'ó xí'in to'on ña vatá ká'an na. Ñivi yó'o kúu ñivi na on xijn ka'an ndí Jesucristo xikuu ra ñivi ndino'o, ta xikomí ra yíkí koñu ndino'o, ñii kiva ndatán yóo yíkí koñu mii yó. Ta ñivi na on vása kándixa saá, kúu ñivi na kóni sandá'ví ndó'ó, ta kúu na ñivi na sáa ini xíni na Jesucristo. ⁸ Kasa kuenda va'a xí'in mii ndó ña on kandixa ndó to'on vatá ña ká'an ñivi yó'o. Saá chi tá kandixa ndó ñavatá yó'o, yiyo ní koto on naki'in ndó ndi'i ñava'a ña kóni Ndios taxi ra nda'a ndó.

⁹ Ndi'i ñivi na sandakoo yichi Jesucristo ta kuá'an na inká yichi, ta ña ké'é na saá sáná'a ña ndí Ndios on vása yóo ra táku ra ini ñivi yó'o. Ta ñivi na ñii ñii kivi va'a ndíkon na yichi Jesucristo, ta saá Yivá yó Ndios yóo ra táku ra ini ñivi yó'o, ta saá tuku Sa'ya ra Jesucristo yóo ra táku ra ini na. ¹⁰ Tá yóo ñivi na kixaa noo ndó, ta ñivi yó'o saná'a na ndó'ó inká to'on ña on vása yóo yu'ú xí'in to'on ña saná'a Jesucristo mii yó, ta saá on naki'in ndó ñivi yó'o xí'in ña on vá'a sáná'a na, ni on ka'an ndó káchí ndó xí'in na saá: “Va'a ya'a ndó koo ndó ve'e ndi xí'in ndi.” On káchí ndó saá xí'in na. ¹¹ Saá chi táná ka'an ndó to'on ña va'a naki'in ndó ñivi vatá yó'o, ta ña ké'é ndó saá kóni káchí ña ndí ñii káchí yóo yu'ú ndó xí'in ña on vá'a ké'é na.

*To'on yó'o ká'an ndí taJuan kóni ra
ko'on ra koto ra ñivi na naki'in tutu yó'o*

¹² Yóo kua'a ní ka ña kóni i ndato'on i xí'in ndó, ta on taa ka i ña noo tutu. Ndáti i ndí yachi ní xaa i nda noo yóo ndó ña ka'an tá'an yó, ta saá nakutú ndi'i ini yó xí'in ñasii ní.

¹³ Ndi'i nivi na kándixa Jesucristo na táku ñoo yó'o noo yóo i vitin, nivi yó'o kúu na nakaxin Ndios kundikon na ra, ta vitin nayó'o tí'ví na to'on xaa ña nda'a ndó ña chindeé na ndó'ó, na kúu nivi na kándixa Jesucristo. Saá ná koo ña.

Alacatlalzala Mixtec New Testament
Mixtec, Alacatlalzala: Alacatlalzala Mixtec New Testament (New
Testament+)

copyright © 2019 Wycliffe Bible Translators, Inc.

Language: Mixtec, Alacatlalzala

Contributor: Wycliffe Bible Translators, Inc.

All rights reserved.

2020-11-11

PDF generated using Haiola and XeLaTeX on 14 Jun 2022 from source files dated 13 Jun
2022

a74bfb3f-bd55-5ab9-983e-8d19de48c198